

حقوقی بیکسیر مجموعہ سی

آیدہ بر نشر اولتور

نادر هادئ سر:

دردنجی نسخه مزده محكمه تمیزك تصحیحاً تصدیقه اقتران ایدن بر اعلامی نشر
ایتمش ایدك؛ مذکور اعلام اولكی نقضك اسباب موجبہ سی مسكوت كچر دیکندن بو كی
اعلاملرده نقض اسبابكده توضیحی قارئلر ایچون موجب استفادہ اولدیغنی كمال حرمته
درمیان ایلمش ایدك. محترم بر رفیقمدن آلدیغیم بر تذکرده بودعوی حقنده نظر دقم
جلب ایدلدیکندن مسئلهی دها یقیندن تدقیق ایتدم. شو نتیجهیه واصل اولدم: بر سفینه
صاحبی، هر نه صورتله اولورسه اولسون غرق اولدقده مستأجر طرفندن بدلی تضمین
ایدلك شرطیله سفینه سی ایجار ایتدیکندن وقضا نتیجه سنده سفینه غرق اولدیغندن بدلك
تضمینی طلب و اواصورتله حکم استحصال ایتمش ایکن محكمه تمیز مأجورك امانت ماهیتده
اولوب تعدود تقصیر اولمادقجه ضمان ایجاب ایتمه جکی حقنده کی اعتراضی وارد کورهر ك نقض
ایتمشدر. مدعی منقوض اعلامی استحصال ایدهر ك محكمه بدایتہ عرض ایله تشکیل طرفیدن
صوکر ا اصراری ومدعی علیه اتباعی طلب ایتمکله بالما کره محكمه اصلیه اتباعه قرار
ویرمش واساس دعوا حقنده طرفینك دیه جکلرینی سؤال ایتمشدر؛ مدعی و کیلی استمهال
ایتدکن صوکر ا اعلام منقوض علیه تصحیح دعواده بولونمش و بو دفعه محكمه تمیز
حکم اصلی یی تصدیق ایتمشدر.

حال حاضرده ایکی حکم وارد؛ بری محكمه تمیزك تصحیحاً و یردیکلی وقطعیت کسب
ایتدیکلی قرار؛ دیگر طرفدن محكمه بدایتك اتباعه قرار و یردیکلی اعلام منقوض؛ بو ایکی
قرار یکدیگرینه مابین ایسه ده، نتیجه، بر اتیق نقطه سندن مباينت یوقدر؛ شکلده بر غیر طبیعیلك
محسوس اولقله برابر حقیقتده، مدت قانونیه سی ظرفنده پایلان تصحیح قرار استدعای اوزرینه
محكمه تمیزك اعطای حکمه صلاحیت واسعه سی بولوندیغندن و یردیکلی قرار قطعیدر؛
و محكمه اصلیه نك اتباع قرار ی مهممل و کأن لم یکن حالده قالمق لازم کلیر. بعض رفقا
اتباع قرار یله مدعی علیه لهنه برحق مکتسب موجود اولدیغندن بو فکری تنقید ایدیورلر.
محترم رفقا نك بو باده کی مطالعه لرینی لطف ایتملرینی رجا ایلام. غ. ف]